



UNIVERSITÄTS-
BIBLIOTHEK
PADERBORN

Universitätsbibliothek Paderborn

Historia VWestfaliæ

Schaten, Nicolaus

Nevhvsii, 1690

Reverendissimo Ac Perillustri Domino D. Wilhelmo Libero Baroni De
Fvrstenberg, Præposito Monasteriensi, Decano Salisburgensi, Canonico
Capitulari Paderbornensi, ...

urn:nbn:de:gbv:3:1-367846

REVERENDISSIMO AC PERILLUSTRI
DOMINO

D. WILHELMO
LIBERO BARONI
DE FVRSTENBERG,

PRÆPOSITO MONASTERIENSI,
DECANO SALISBURGENSI,
CANONICO CAPITULARI PADERBORNENSI,
PRÆPOSITO COLLEGIATARUM ECCLESiarUM
IN BUSTORFF ET MESCHÉDE,
CONSILIARIO INTIMO CELSISSIMORUM PRINCIPUM
ARCHIEPISCOPI SALISBURGENSIS ET EPISCOPI MONASTERIENSIS.

REVERENDISSIMO AC PERILLUSTRI DOMINO

D. IOANNI ADOLPHO
LIBERO BARONI
DE FVRSTENBERG

ET DOMINO IN ADOLFSBURG,
PRÆPOSITO ECCLESIAE CATHEDRALIS PADERBORNENSIS,
CANONICO CAPITULARI CATHEDRALIUM ECCLESiarUM
HILDESIENSIS ET MONASTERIENSIS,
PRÆPOSITO ECCLESiarUM COLLEGIATARUM
AD S. CRUCEM HILDESII ET VETERIS TEMPLI MONASTERII,
CONSILIARIO INTIMO PADERBORNENSI.

PERILLUSTRI AC GENEROSO DOMINO

D. FERDINANDO
LIBERO BARONI
DE FVRSTENBERG

DOMINO IN FURSTENBERG, SCHNELLENBERG,
HERDRINGEN ET WATERLAP,
CUBICULARIO AUREAE CLAVIS SERENISSIMI COLONIENSIS
ET CONSILIARIO IN DUCATU WESTFALIAE,
SATRAPÆ IN BILSTEIN, WALDENBURG ET FREDEBERG,
ADVOCATO HÆREDITARIO IN GRAFFSCHAFFT,
ET DOMINO IUDICII IN OBERENKIRCHEN.

REVERENDISSIMI AC PERILLUSTRES &c.
PERILLUSTRIS AC GENEROSE DOMINE.



I Deo O.M. ita placuisset, & Illustrissimum fratrem ac patrum Vestrum, Celsissimum Principem P. M. Ferdinandum, Episcopum Paderbornensem ac Monasteriensem, ad illud usque tempus in vivis conservasset, quo operi huic meo typographico ultimam manum imposuissem, nulla mihi deliberatione opus fuisset, cui hoc ipsum Patrono, pro more alijs jam dudum usitato, commendarem; etenim quod ille Historiæ hujus potissimus fuisset auctor, quam patriæ & gentis suæ Westfalicæ bono, collegerat, quamque magna sollicitudine, & plurimis impensis per alios literarum Historiarumque amantes eò promoverat, ut lucem aspicere, & eruditorum teri manibus posset; alium, meo quidem iudicio, præter se, operi huic patronum præfigi non sustinuisset; mihi certè fas non fuisset, præterito illo, alium convenire, utpote qui ab eo tempore, quo is ad capeffendas Paderbornenses Insulas Neuhausium advenit, eidem Imperij ac literatorum Principi à typis constanter fui: Monumenta illius Paderbornensia (quorum hæc Historia diffusior explicatio est) primus impressi; aliaque deinde, illo volente ac iubente, magno cum commodo meo, tum approbatione illius, tam varia prælo subjeci, ut citra vel ingrati vel inurbani animi notam alium præter illum Patronum eligere integrum mihi non fuisset. At nunc meo hoc & literatorum omnium Mæcenate, ingenti doctorum hominum mœnore, è vivis ereptò, quos potius operi huic Patronos adsciscam, quàm Vos, Reverendissimi ac Perillustres fratres, Perillustris ac Generose Domine, magnorum Præfulum dignissime nepos? Ut enim taceam, quod frequentissime me impuleritis, ut labori non parcerem, sed omni adhibita diligentia curarem, ut quàm citissime in lucem ederetur opus hoc tantopere à summis infimisque expectatum; itaque tacite mihi innuere visi fueritis, sub Vestro velle Vos auspicio id ipsum prodire, cuius maturationem tam seriò ac frequenter urfissetis; ut, inquam, id taceam, vos præ alijs opus hoc concernit, quod ad Westfalicæ gentis gloriam conscribi vulgarique voluit eum Illustrissimus frater, tum patruus Vester, quodque moriturus commisit curæ Vestræ, ut Vobis agentibus non remaneret in tenebris, quod ille protrahi in lucem tantis semper desiderijs concupierat. Eam nunc voluntatem Principis Vobis sanguine tam propinqui si in memoriam revocaveritis, dubium mihi nullum relinquitur, quin commendatum à me opus libentissimis animis suscepturi sitis. Quanquam quid alienos adduco titulos, ut curam & patrocinium operis mei persuadeam? Amor ille literarum, qui non secus in Vobis, quàm in defuncto Celsissimo Principe, ab adolescentiâ ad maturam usque ætatem spectatus fuit, multiplex illa tot annorum decursu maximâ sedulitate comparata eruditio, longa illa inter quam plurima negotia & prudentissimos homines parta experientia, &
quæ

quæ alia in Vobis præfulgent eruditissimorum Virorum decora facile animos Vestros inclinabunt, ut hujus tutelam operis suscipiatis; Historiam illud complectitur; & quid in omni Vobis vita acceptius fuit, quam istiusmodi lectione animum ad omnem eruditionem instruere? & Historiam complectitur Westfalicam, in qua primæ hujus gentis origines, gesta cum præcipuis orbis populis (Romanis ac Francis) bella, propugnata invictis animis per plura secula libertas, abjurata Idolorum servitus, suscepta Christi religio, aliaque ad gentis gloriam spectantia, scitu lectuque dignissima, pertractantur; ecquæ verò gravior Vobis Historia offeratur? qui gente Westfali, genere nobiles, familia illustres, originem à majoribus ducitis, de quibus dubium non est, quin primis nobilissimorum Westfalorum vestigijs inhæserint, cum eorum permulti primas qua sæculares qua Ecclesiasticas dignitates suo merito sint consecuti, (quorum uberior commendatio in subsequendis Annalium Westfalicorum libris legi poterit) Domesticam itaque historiam videtis, non peregrinam; quæ vel hoc ipso præ alijs exteris perplacebit. Sed quorsum pluribus hæc inculco, cum de propensissimo Vestro in hoc opus animo satis mihi constet? later potius, eos me nactum patronos, qui id ipsum auctoritate sua ab obtreptantium, si quæ fortè occurrerint, linguis defendere suo tempore poterunt. Etenim si S. R. I. Principes excepero, penes quos ex gente nostra Westfalica ea auctoritas major, quam penes Vos in primis, Reverendissimos ac Perillustres fratres? qui multis ad Cæsarem, Principes & Comitum Imperij legationibus clari, S. R. I. Principum, quibus ab intimis consilijs fuistis ac etiamnum estis, familiaritate noti, ac præcipuis qua Cathedralium qua Collegiatarum Ecclesiarum dignitatibus illustres inter præcipua Westfalicæ gentis decora eminetis; & te deinde, Perillustri ac Generose Domine, Ferdinande Fürstenbergice, qui eam feliciter familiam propagas, quæ præter tres S. R. I. Principes, & quam plurimos in Ecclesiasticis dignitatibus constitutos præfules, tot sago togaque inclytos viros produxit, ut nulli dubitare fas sit, quin plurimum semper splendoris natio Westfalica ab illustri tua familia acceperit; ut nihil dicam de præclaris tuis tibi proprijs dotibus, ijsque honorum gradibus, in quibus positus, sicut alijs præemines, ita meritissimo jure eam tibi auctoritatem vendicas, quæ abunde pro tuendo hoc opere mihi sufficiat. Fretus itaque tanta auctoritate, & securus de propenso in me studio, opus hoc, unam Historiæ Westfalicæ decadem continens, Vobis, Reverendissimi ac Perillustres fratres, Perillustri ac Generose Domine, Ferdinande Fürstenbergice, ea submissione offero, quæ obsequentem famulum decet, nihil dubitans, quin benevolis id ipsum manibus accepturi sitis, & sicut impressionem hujus serio urstis, ita deinceps studium & impensas ad superstites Annalium Westfalicorum edendos libros necessarias sitis collaturi.

REVERENDISSIMARUM AC PERILLUSTRIUM VESTRARUM,
PERILLUSTRI AC GENEROSÆ DOMINATIONIS TUE

Obsequentissimus famulus

Joannes Todt, Typographus.